

Mama di victima a muestra cu su yiu muhe menor di edad ta bao tratamento di psychiater

Pa por scucha mas testigo, a pospone caso di abuso sexual

ORANJESTAD – Den sala di Corte tabata reina un situacion hopi fastioso durante tratamento di e caso penal contra e homber B. cu ta wordo sospecha di a abusa di un menor di edad. Di un banda tabata e famianan di e sospechoso, kendenan ta di opinion cu e sospechoso ta inocente. Di otro banda tabata e mama y su yiu muhe, caminda por a nota claramente con rabia e mama tabata. Por a nota cu e miembronan di CEA tabata atento pa cualkier eventualidad.

VIOLA MENOR DI EDAD

Fiscal a acusa e homber B. cu entre Mei y Juni 2012, el a viola un mucha muhe menor di edad. Hues a muestra cu segun e proces-verbaal di polis, dia 5 Juni 2012 e mama di e victima a entrega keho. E mama a declara na e agentenan encarga cu casonan di violacion y immoralidad, el a contesta un yamada riba celular di su yiu muhe.

E mama a puntra su yiu kende e homber ta. E yiu a cuminsa yora y a splica e mama cu e homber ta B. kende a pidi'e pa subi den su auto y a bay cun'e den mondi y a forc'e tene relacion sexual. E homber lo a keda manda e victima cu mensahenan. E mama a ripara cu su yiu a cambia masha hopi y tabata halsa bos. E yiu tabata distan-

cia su mes di hende.

Den sala di Corte por a nota cu e mama, cu bril di solo bisti, tabata keda fiha cu rabia riba e sospechoso na momento cu Hues tabata lesa e declaracion di su yiu kende a splica kico e sospechoso tabata haci cun'e den e auto. Hues a muestra cu e victima a suplica e sospechoso pa no haci'e pero e sospechoso a insisti pa tene relacion sexual. E victima a bisa cu el a sinti masha hopi dolor y despues di e incidente el a bira masha depresivo. E victima a splica cu B. tabata impone riba dje y cu e mester yama B. Den confrontacion, e victima a reconoce e sospechoso.

SOSPECHOSO TA NENGA

Hues a muestra cu B. mes a declara cu e no sa di nada. El a bisa cu e tin un primo cu e ta hiba school y cu nunca el a yama y conoce e victima. Despues el a tende di su primo O., cu e tabata conoce e victima. Segun e sospechoso, e primo tabata yam'e.

Den Corte, B. a bisa Hues cu si supuestamente el a viola e victima, con por ta cu e victima ta blo yam'e. Ademas cu e victima lo a bisa cu e lo a menasa e victima, unda e menasa ta!. Hues a hala B. su atencion pa baha su bos y cu ta Hues ta esun cu ta haci pre-

gunta y no B. Varios biaha Hues tabata hala B. su atencion pa e contesta e preguntan cu Hues ta haci, y pa B. no bay haci comentarionan. B. a bisa Hues cu e no conoce e victima y no a papia cun'e. El a bisa Hues cu su primo tabatin hopi contacto cu e victima. El a bisa Hues tambe su segun su primo, e victima lo tabatin relacion cu otronan tambe. B. a bisa Hues cu ta un bes so el a mira e victima ora el a hiba su primo school. Hues a muestra cu segun e rapport medico, dia 5 Juli 2012, ginecologo a constata cu e victima a wordo penetra.

KIER MIRA LISTA DI YAMADANAN

Tabatin discusion den Corte riba yamadanan entre e celular di e sospechoso pa e cas di e victima. Fiscal a bisa cu tin un cantidad di yamada print out pero no a presenta esakinan. Fiscal ta papia di alrededor di 500 pagina.

Hues ta haya cu e print outnan ta hopi importante pa e caso. E sospechoso ta para riba cu e no a yama e sospechoso. Sinembargo segun Hues, tin yamadanan di e sospechoso pa e cas. Hues a bisa cu e ta haya esaki importante pero ta compronde punto di bista di Fiscal cu ta trata di 500 pagina. Abogado mr. Lejuez a

trece padilanti cu por bien tabatin un bruhamiento di Polis of cu lo tabatin yamamento di parti di e sospechoso pa victima y di otro banda.

Hues a bisa e abogado cu si e kier mira print out esey ta nifica cu mester pospone e caso. E abogado a bisa Hues cu e kier sa di unda e agentenan a yega na e informacionnan aki. E abogado a menciona e lunanan cu e kier mira print out di e celular di e sospechoso.

Hues a remarca cu e primo di B., O., a menciona nombernan di personanan cu kende e victima lo a tene relacion. Hues a remarca, pakico Fiscal no a laga investiga esaki. Fiscal a bisa cu e informacion a drenta 1 aña despues y no ta relevante mas. Abogado ta haya cu e ta importante pasobra e victima ta bisa cu ta prome biaha cu el a haci relacion ora cu B. a forc'e. E abogado ta haya cu lo mester scucha e personanan cu O. ta menciona pa asina determina si enberdad ta prome biaha manera e victima ta bisa. Hues a bisa cu e ta permiti algun di e personanan wordo scucha como testigo pasobra e no ta haya e otronan relevante.

POSPONE E CASO

Hues a informa e mama di e victima cu e tratamento lo no

bay sigui y si e mama ta desea di entrega demanda di daño e por haci esey ora cu e caso lo sigui. E mama a presenta documentonan na Hues. Mama di e victima a bisa cu actualmente su yiu ta bou tratamiento di psychiater pa tur loke a sosode. El a pidi Hues pa su yiu no bin mas Corte. Hues, despues di a mira e documentonan, a bisa e mama pa otro biaha cu e caso ta sigui, pa argumenta e demanda y e cartanan bon y cu no ta necesario cu e victima ta presente. El a pospone e caso y a bisa cu Hues Comisario lo mester scucha e dos testigonan y Fiscal lo mester presenta cu e lista di yamadanan. A fiha 17 Mei pa 2'or di merdia pa sigui cu e caso.

TIRAMENTO DI PALABRA

Pafu di sala di Corte, miembronan di CEA tabata atento y por a nota cu na salida di edificio di Corte, e mama cu e victima tabata sinta y net e momento ey, e famia di e sospechoso tabata saliendo. Un miembro di CEA a para dilanti e mama y e victima y a bisa e otronan pa sigui cana bay pafu. Un di e familiarman a tira palabra pa e mama di e victima y por poco tabatin confrontacion. E accion rapido di e miembro di CEA a evita cu cos lo por a bay for di man. □